

De Kwakel

CV de Moerebuuk
Jaorgank 58



Prins Micky I
Prinses Sofie



Ivette speelt de goede fec

Blz. 11

Primeur veur KVV Èll: ranja oppe tap

Blz. 12

Witte sjoon, welke kleur?

Blz. 9

Wiel kan de was doon

Blz. 7

String inne zak

Blz. 5



Jeugdprins Ties
Jeugdprinses Imke

Vastelaovendj 2023

De Kwakel

Proclamatie

CV DE MOEREBUUK
Jaorgank 58



Ich, Prins Micky 1e, 72ste Prins vanne Moerebuuk, zoon van Math Beurskens en Christa Smeets. Gebore op 11 juli 1994 in 't zekehoes in Wieërt, mer gelökkig weer snel trök gebrachdj nao 't Moerlandj. 't Vastelaovesblood höb ich gekrege van miene Opa, Wiel Beurskens, mede-oprichter, aod vorst en aod prins vanne Moerebuuk.

Ich bèn opgegruudj oppe Craenenstraot 11, mèt mien 3 breurs, Jim, Bowen, en Jur. Neet allein de leefdje, mer ouch de leefdje veur de Vastelaovendj, deil ich mèt mien Prinses Sofie van Logtestijn, of zoeë-as ederein 't zeet, Sofie vanne geiten. Same mèt Sofie woeën ich sinds kort in ós eige huuske in Èll.

In 't dagelike laeve staon ich veur de klas. Ich gaef technieklesse houtbewèrking, op Het Kwadrant in Wieërt. In miene vrieje tied bèn ich gaer aan 't klusse. Zoeë höb ich same mèt mien prinses eine aoje camper compliceet opgeknaptj. Ouch vinj ich 't lekker óm get te póngele in de aoj wèrkplaats van opa. Ein pötje beer drinke mèt mien vrinj gaon ich ouch zeker neet oet de weeg.

Same mèt mien adjudante Cas, Joost en Thom en de dames Bo, Maud en Romy, zeen wae op völ plaatse óngerdeil van 't verenigingslaeve. Zoeë-as de organisatie van de Zomercarnaval, spoeëk bie Stichting Spook, en lid van de geweldjige vastelaovesgroep en Gouwe Rog winnaar VV de Vervaelers... die dit jaor dus zeker weer mèt mótte loupe mèt de Èller optocht. Gae hooftj neet veur eine gouwe rog te gaon, aangezeen wae dae nog steeds in ós bezit höbbe. Daonaeve bèn ich ouch nog op 't voetbalveldj te vinje. Sinds dit jaor staon ich ónger de lat bie voetbalclub Veritas oet Neeritter.

Bie de gratie van Groeëtvorst Jan en Groeëtvorst Henri, Vorst Steef en de Raod van Elf wil ich uch 't volgendje dudelik make:

- Miene droum óm prins te waere is bie deze oetgekómme.
- Det wae same mèt de Jeugdprins, Jeugdprinses, heur adjudante en de jeugdraod d'r ein geweldjig fieëstje van gaon make. Weem det geit waere zeetj gae mörge, dus kóm allemaol nao de kinjer bóntje middig.
- Det dit ouch zeker geldj veur mien adjudante, Cas, Joost en Thom en de dames Bo, Maud en Romy, wae gaon d'r alles aan doon óm 't Moerlandj oppe kop te zètte, zeker naodet wae ein jaor extra höbbe mótte wachte.
- Det wae dit nateurlik ouch same mèt de men en dames van de Raod van 11 doon.
- Det wae hope det de Èller muzikante d'r veur zörge det d'r zoeë völ as meugelik livemuziek is tiejes de vastelaovesactiviteite.
- Det VV de Vervaelers veur 't ieëst eine Prins inne groep te pakke heet.
- Det de groep Spieje veur de twieëdje kieër ein prinses inne groep heet.
- Det wae d'r vanoet gaon det allebei de groepe dus extra hel gaas gaon gaeve dit jaor.
- Vanaaf vandaag zal de Craenenstraot, de Prinsenstraot genumdj waere.
- Det ich, mien Prinses en adjudante d'r echt óntzettend völ zin in höbbe, en neet wille det d'r emes aan de kantj blijft staon. Vastelaovendj vere wae same!
- Det ich neet allein 't vastelaovesblood van Opa höb ge-orve, mer ouch 't wèrke mèt hout.
- Det ich daoróm, net als opa vreuger, zal regere in de orde van 't Haemerke!

Lang genógt gezeiverdj, noe is 't tied óm te fieëste. Ich wil uch allemaol eine geweldjige Vastelaovendj winse, dit ónger mien motto:

Fieëstj vandaag, dinktj neet aan mörge, want de man mèt de hamer, zal uch koppien bezörge!!!





Weurdje vanne prins

Leef Moerebuuk,

't Is Èll kèrmes, ich staon fijn in 't zaalgedeiltje vanne Bachelorclub get te pilsen mèt mien vrinj. Ich kóm toevallig aan de kal mèt Steef. Dae zeet mich det ze nog techniekdocente bie hum op sjoëël zeuke, en of ich dao mesjien ins euver nao wil dinke. 'n Paar daag later steurtj Steef mich 'n berichtje mèt de vraog, of we 'nne daag aaf kónne spreake óm 't d'r ins euver te hóbbe, same mèt ziene teamleider vanne sjoëël. Ich op dae geplandje daag nao de aafgesproken plaats gereje veur 't gesprek. Op 't moment det ich dao kwoom, waas allein Steef dao... Hae zeet; "Wea gaon alvast nao binne, miene collega keumtj zoeë. Den kóns se alvast door 't contract blajere." Ich ging mich fijn zitte en Steef goof mich alvast de papere. Ich drei de ièrste bladzij óm, en weit neet waat ich zeen. Oppe ièrste pagina steit groeët "Draaiboek prinsencomité 2022"! Ich vónj 't direct hieëlemaol tegek.


Ich haaj mèt Steef aafgesproke det as wae 't zoeëje doon, ich veur 't weekend 'n duumpke ómhoeëg zoeëj steure. Sofie waas nog in Utrecht, en die zoeëj ich pas in 't weekend zeen. Det doordje mich te lang. Wie ich inne auto zoot, hób ich Sofie gefacetimejd, en 't verhaol euver de vacature techniek lieëraar oetgelagd. De timing waas neet perfect, want zie zoot oppe fiets. Op 'n moment vroeg ich of ze mich mesjien advies kos geave, ómdet d'r get hieël raars in 't cóntract sting. "Laot kieke" zeet ze, en ich haoj de pagina mèt "Draaiboek prinsencomité 2022", veur de camera. Direct nieptj ze de remme van de fiets zoeë hel in, det ze haost veureuver vanne fiets aaf vèltj. Ze sjrók zich kapot, mer zagt al hieël snel, jao det gaon wae doon. Deazelfdje aovendj hób ich Steef nog 'n duumpke ómhoeëg gesteurdj det wae 't gaon doon. De weak d'rnao zeen wae ós adjudante gaon vraoge, allemaol op 'n anger maneer, mer ein veur ein wore de reacties goud waerd. Gae haadj d'rbie mótte zeen. Doordet corona al versjillendje kieëre root in 't aete gegoeëdj heet, zeen wae noe ouch extra blie det wae nao 'n jaor oetstèlle weer los kónne gaon.

Leef moerebuuk ich wins uch allemaol 'nne ónvergaetelikke vasteloavendj, en genietj d'r extra hel van, want 't is al veul te lang geleje!

Alaaf !!
Prins Micky I



Vorstewissel



Groeëtvorst Henri



VORST STEEF





Wisj dj'r al..

- det d'r aafgeloupe vastelaovendj weer eine sjeke Vastelaoves Kwis inein gezatte waas;
- det ein van de vraoge 'n muziekfragment van de Wieërter groep "Harry & de Gebroeëke Zwiêgelkes" waas;
- det Josje 't geluid drek herkêndje en vol euvergave reep: "Dae weit ich! Det is Harry en de gebroke vleugelkes!!"



Stille elektrische auto

Ze haje 'nne noewe auto gekocht en dae haaj geine benzien mieër nuuedig. Volledig elektrisch en alles d'rop en d'raan. Dich huerdj es neet detter leep en ouch as se gaas goofst bleef 't stil inne auto. Jan en Gert (van Lemme) gaon mèt heure noewe auto nao de Aoje Limburger in Meijel en parkere hum in 'n groeëte wei. Ze kieke nao de optocht, gaon inne tent get drinke en gaon nao de sjötterie van Èll kieke. As die oetgesjote zeen gaon ze heiwes. Bie de auto aangekómme kumptj Jan d'r achter det de auto neet is aafgeslote. Sterker nog, hae haaj hum neet oetgezatte. Nao 6 oor loupe waas de accu neet leeg en de airco haaj gezörgdj det t'r good keul waas. Heet völ veurdeile zónne stille auto.



Henj aan 't steur

Pieter zoot met Siem en Fiene Formule 1 te kieke. Max Verstappen laag op kop en móst zien positie flink verdedige. De commentator zeet op ein gegaeve moment: "Max houdt de deur goed dicht."

Fiene kiekjt Pieter aan en zeet: "Papa, ich snap get neet. Wie kan Max mèt twieë henj steure en den ouch nog zien deur toe haoje?" Wae (red.) vraoge ós det ouch aaf, Fiene.



MIJN BUURT MIJN SPAR




SEBASTIAANSTRAAT 12
6011 RE ELL 0495-551285



Dokter, wat doet u nou?

Lydie, net getrouwdj mèt Jelle Heber, is hoesarts van beroep. Ze kumtj tiejes heur werk versjillendje klachte en kwaaltjes tege. Daoróm wirkjt 't prettig as ze veur ein consult ein dudelikke ómsjrijving van de klachte kriegjt van de doktersassistent. Op eine wirkdaag kwoom d'r eine patiënt op consult. Lydie haaj gelaeze det de klachte te make haje mèt 't voorhoofd. Ze begost mèt 't óngerzeuke van zien voorhoofd. De patiënt mót zich toch hóbbe aafgevraagd of Lydie heur diploma waal haaj gehoordj, want hae kwoom toch echt veur klachte aan de voorhuid. Oeps, doktersassistent! Wae vraoge ós aaf waat erger is.. 't Voorhoofd óngerzeuke as se inne óngerbóks móst zeen, of inne óngerbóks óngerzeuke as se op 't kópke móst zeen!



Finding Peter Heber

Peter haaj reünie van zien klas vanne basissjoeël. 't Waas erg gezellig en 't waerdje al get later, mer Peter haaj nog niks gein zin veur heives te gaon. Thea beldje regelmaotig óm te vraoge wie de standj van zake waas. Op ein gegaeve moment paktje Peetje de telefoon neet mieër op. Thea beldje en beldje mer kreeg gein gehuuer. Rondj 5 oor smörges beldje ze Jelle óm te vraoge of hae wist woeë Peet waas. Jelle wist 't ouch neet mer besloot zelf mer ins te belle. Peter paktje de telefoon drek op: "Ha Jelle!" "Ha pap, woeë bès se?" "Ich lig in béd, wiezoeë?" "Ómdet mam vreugtj woeë des se bès!" "Oké, ich drink deze op en den kóm ich heives."

Wisj dj'r al..

- det Maarten bie 't verbouwe pur in zien haor kreeg;
- det hae toen van ieëlenj ziene kop mer kaal heet gesjore;
- det 'm det pien deej, want hae waas zo trots op ziene kapsel, dao haaj d'r 1,5 jaor op gespaardj!



De Kwakel

Sjoeëne film gezien bie KVVW?

De kinjer van groep 3, 4 en 5 ginge nao de Bachelorclub óm nao 'nne film te kieke. Altied weer spannendj óm in zón dónkel ruumdje te zeen. En den zón groeët sjerm. Wie de kinjer smiddes op 't veldje trök kwome vraoge de aojers: "Waas 't 'nne sjoeëne film?" "Det wete wae neet want wae höbbe d'r niks van gesnaptj". Bleek det 't eine Ingelstalige film mèt Nederlandse óngertiteling waas. Kinjer van dae laeftied kónne neet, of mer 'n bietje, laeze. Bie de (hoofd-)leiding zote versjillendje óngerwiezers. Die wete toch det zónne film neet gesjiktj is veur dae laeftiedsgroep. "Wae höbbe op de Kijkwijzer gekeke of dae film gesjiktj waas, dao sting "Voor alle leeftijden". Mer de kinjer haje waal snuik gekrege, dus heure middig waas aevegood geslaagdj.



Buurman, dich hie?

Jeroen Cauven ziene paetoeëm waas jaorig. Net as eder jaor stapdje hae oppe fiets en ging in Roggel oppe koffie. Hae dreidje de straat in, zat de fiets oppe oprit en leep achteróm. "Huh, höbbe ze verbouwdj tiejes de lockdown?" Hae reuptj ane trap en mèt inne gang kwaam d'r eine mins nao ónger. "Waas d'ich hie?" vroeg Jeroen. "Nae, ich kan baeter vraoge waas des d'ich hie duist, in mien hoes?" waas 't antjwoord. Jeroen waas eine blok te wiet gereje en sting dus bie de buurman inne kamer.



sThom

Thom en Romy verdeile de take in hoes good. Zoeë hëlth Thom zich veurnamelik bezig mèt de tuin en hëlth Romy 't hoes zuver. Mer sinds heur gezinssoetbrejing mèt hundje Millie, waas de aafpraak det Thom éine kieër per waek zoj helpe mèt stofzuige. "Ich gaon det echt doen huuër, huuërtj Romy 'm nog zègge. D'r kwom helaas mer weinig van en Romy besloot de stofzuiger midden in de woeënkamer te zètte, zoeëdet Thom d'r neet mieër ómhaer kost. Dae stofzuiger heet dao bienao tweeë waeke gestange. Oeteindelik waas 't zoeëwiet: Thom ging stofzuige. En ás d'r det den duit, den duit d'r det ouch tegooi. Romy zoot óngertösse in bad, mer ouch de badkamer waardje door Thom gestofzuigd. Wie Romy zich woeëj aankleije, kost ze heure string nörge mieër vinje..

*"Dootj ouch gek,
ein moeër ane stek!"*

**Höbtj gae ouch gaer ein sjoeën
moeër ane veurdeur?
Mia van Roij (Seringestraot 9 in
Éll) is good mèt stóf, naoldj en
gare.**

**Dao zeen d'r in versjillendje
soorte, maote en prieze.**

TEL: 0495 -55 16 55



Timmerbedrijf - Houthandel
W. STEUTEN BV

Grathemerweg 49B
Kelpen-Oler
0495-652178

www.steutentimmerbedrijf.nl



Pap trakteertj

't Is de vriedig vanne vastelaovendj en gelökkig zeen de Èller cafés ope. Dus Megan geit nao Joeri. Ein half oor later is ze alweer thoës, mer de bónne zeen nog neet op. Ze vreugtj: "Pap, wils se dees bónne euverkoupe? Veur 20 euro, des gewuuen Joeri ziene pries. Ich höb d'r mer eine gedronke." Roland is verbaasdj en vreugtj: "Geis se neet mieër trök den?" "Jaowaal, " is de reactie, "mer den bès dich ouch dao en den kóm ich bie dich bónne hole."



Doon eur veut pien inne sjoon,
den kóntj gae bie Bep, Sonja, Peggy of Lieke
de veut laote doon!

Bep van Oosterhout

Medisch pedicure & oncologisch voetzorgverlener

Scheijmansplein 5, Ell / St. Willibrordusstraat 10, Nederweert
Beltj veur 'n afspraak nao: 06 5435 8227

FERMATE

Muziekproducties • Dirigeren • Arrangeren • Componeren •
Produceren • Registreren • Presenteren •
Dialectpop • Artiestenbegeleiding • Projectcombo •
Advies m.b.t. muziekprojecten • 'Studio Linje'

06-55703344 • INFO@FERMATE.NL • WWW.FERMATE.NL

Henderikx
Vastelaovendj Same! UW GROENE vakwinkel
Weverstraat 5A 6013 RA HUNSEL Tel.: 0495-786807
ALLES VOOR DHZ, TUIN & DIER

Iets mèt eine ezel en stein

Wètg gae nog det in de veurige Kwakel sting besjreve det Noud en Pleun op vakantie wore in Italië? En det ze toen ein scootertocht gebooktj haje op de daag det ze alweer óngerweeg wore nao ein anger bestumming? Dit jaor ginge ze nao Canada. Ze en bookdje ze ein wildlife-tour. Ze lèdje extra good op de daag, want det foutje van veurig jaor, det ging heur nateurlijk neet nog eine kieër gebeure. Ze moste hieël vreug in de mörge vertrèkke, mer det uitje waas 't waerd, vónje ze. Zoeë zote ze rónjd 5 oor 's örges klaor óm opgehaoldj te waere. D'r kwaam mer gein buske en al snel waerdje nog mer eine kieër de datum op de booking gechecktj. Ze zote toch echt op de goje daag klaor. Ze wachdje en wachdje, mer 'n oor later waas d'r van ein buske nog niks te bekinne. Tot 't kwartje veel. Ze wore in Canada, dao wèrke ze mèt AM en PM. Ze zeen toen mer snel weer heur bèd in gedoke.



Ver-standj

Micky en Sofie zeen gaon samewoeëne en dus most d'r eine noewe televisie kómme. Ze ginge same nao Wieërt. Ze waerdje geholpe door eine vrentjelikke mins en dae vroeg aan heur: "op welke afstandj mot dae TV kómme te hange?" "Wae zeen van Èll, det is neet zoeë wiet van hie", zagt Sofie.



Advertentie

CV de Moerebuuk heet nog
moeëresjaals te koup.
Lekker werm veur as 't boete kaod is.

Dao zeen ouch nog
Oranje Beukskes
te koup.
Dao steit in wie
se plat Èlls móst
sjrieve.



CV DE MOEREBUUK
Jaorgank 58



Veur eine appel en ein paer
gaotj gae nao
fruitbedrijf Moors
haer.



Reservering op 'n slakkegang

Thirza waas jaorig en Glenn trakteerdje op ein aetentje bie De Slak. Veur diegene die De Slak neet kinne; det is 'n hippe tent, daoróm haaj Glenn ouch ruum oppe tied gereserveerdj. Wie ze in Neejwieërt aankwome, zote alle täöfelkes vol en op de naam 'Brennand' sting gein reservering. Nao effe gewachtj te höbbe, kwaam d'r ein plekske vrie en koste ze gelökkig toch aan taofel. Daags d'rnao kreeg Glenn ónger 't werk 'in telefoontje: de garçon van Restaurant De Slak in Eindhove vroeg zich aaf woeërom hae gister neet waas kómme aete?



Net neet



Annie van Wiel van Toeëm kost dus neet good ónger de veut oet, want ze haaj heure voot gebroke. Gelökkig stook Wiel gaer 'n handj oet óm te helpe. Zoeë zat hae ouch 'n mesjien was aan. Annie haaj 'm dudelikke instructies gegaave: "De BH's mós se in ein nètje doon, want anges verrennewere die mich hieël." Wiel deej fijn waat hum gevraagd waas en hae hing later ouch de BH's mèt nètje en al ane draod. Annie haaj d'r neet bie vertèldj det hae die d'roet most hole.



SJERP GEZEEN ANNELIES

Remko waas oetgenuuedigd veur 't trouwfieëst van Jesse en Evie Greijmans.

Hae woeëj d'r netjes op staon, dus mam waerdje ingesjakeldj óm foto's te make, zoeëdet hae kost beslisse welke sjoon 't beste ónger zien outfit zoeëje staon. Annelies knipdje 'n aantal foto's achterein en keek lestig. Ze knoterdje det ze de foto's neet sjerp kreeg. Ze maaddje nog get foto's en grouweldje nog mieër. Want ouch die wore neet sjerp. Toen inins bedacht ze zich get, maaddje zich nao binne en kwaam mèt de bril oppe naas weer trök...

Loonbedrijf
v.d. Looij B.V.
Tel. 0495-551 445

Dao veel 't kwartje



James waas aan 't verbouwe en hae waas hel ane gang mèt 't oetbraeke van de keukevloer. De stiek van ziene besjermingsbril waas d'r oet, dus zat d'r zich de aoje laesbril op. Ónger 't hammere zuut hae get blinke. "Det is eine aoje Riksdalder," dinkj James, "dae raap ich zoeë waal op. Effe dit stökske nog doon." Wie d'r de Hammer losleet en de muntj woeëj oprape, waas dae nörges te vinje. D'r laag waal ein kwartje. "Nou," zeet t'r tege Chantal, "dae bril vergruuetj waal erg good!"

**B&B Linje**
EIN LEKKER BÈD EN GOED ÓNTBIJT
KÓNTJ GAE VINJE BIE B&B LINJE.
ANTONIUSSTRAOT 30 - 06 23091968

Wisj dj'r al..

- det Jesse mètdeej aan de motortocht van 't JWE en op 't lèste moment nog gauw de col paktje, dae d'r mèt rieje altied ómduut tege de vlege;
- det dae col de hieële wintjer inne graasj gelaage haaj;
- det d'r de graasj pas geleje geïsoleerdj haaj ... mèt steinwol!



ZOMER CARNAVAL ELL

25 augustus 2023

TT Haler geit d'r weer tege-aan!

Veurig jaor waas d'r in Haler weer 'nne TT in volle glorie. Op vriedigaovendj kwome de rónkendje motore door Èll, op zaoterdig en zunig waas 't spektakel in Haler te bewónjere. Vól lokale vereniginge leverdje vriewilligers die mèt sjoeën waer en 'n gezellige drókdje de hendjes good lete wappere.

De organisatie vanne TT is dao blie mèt en ouch trots op. Det samewèrke en al die vriewilligers bie-ein zörgtj veur laefbaarheid in klein kerne. Of 't noe de Vervaelers zeen, of KVV of ZijActief, allemaal doon ze d'r toe en zeen ze belangriek. In 2023 geit 't op 14, 15 en 16 juli weer los in Haler. Speciale aandacht dit jaor veur 't merk NSU. In de parade en ouch op 't terrein zultj gae auto's en motore van dit merk kónne bewónjere. Op vriedigaovendj is de Parade en de "Endurance race: "De 2 oor van Haler". Zaoterdig en zunig zeen de TT demoritte.

Zaoterdigavendj geit Anderkovver de tent weer plat speule. Kan eur vereniging ouch 'n extra zakcentje gebroeke? Meldj uch aan as TT vriewilliger. Dao is ederein blie mèt.



Vèttig verke

Jo vanne Kaolder heet eine borrel bie Roland Briels mèt get (aod) Èller veterane. Hie waerdje hei-op gespeculeerdj euver de 'wilj verkes' euverlast in 't brook. Op 't inj vanne aovendj (zèk mer geróstj nacht) woeëj Jo toch via 't meisveldj, gelaegde aan 't brook, nao hoes op zeuk nao ein wildj verke. Nao ein tiedje kwaam d'r de meis oet... gein verke gezeen, bril kwiet en zoog d'r zelf oet wie ein verke. Dus as gae ein verke zeetj mèt 'nne bril... meldj bie Jo.



Wisj dj'r al..

- det Glenn oppe operatiekamer werkt en dao höbbe die jóng allemaol van die apaarte, blieje zök aan ónger heur OK-pak;
- det hae van zien maedje speciaal zök kreeg mèt broc colies d'rop;
- det Glenn bie mam klaagdje: "Die gaon ich dus écht neet aandoon, ich löst neet ins broccoli!"



Rick witte sjoon

Woeërom löptj Rick van Logtestijn mèt zien noew witte sjoon door de aerd?

- Die sjoon zeen lekker werm
- Anges lieke ze völ te noew
- Hae heet gein aoj sjoon



SECRET SINTERKLAOS

Al ein paar daag waas Nicole aan 't vèsse welk leutje Sjoerd getrokke haaj veur de Sinterklaos surprise. Uiteraard leet Sjoerd niks los:

"Det zuus se den waal!"

Mer inmiddels waas 't 4 december en noe sloog bie Sjoerd de stress toch waal toe. Hae most nog 2 gedichtjes make, ein veur de surprise en ein as verrassing veur zus Lieke. Zweetendj zat t'r zich ane computer en nao ein puueske good doortype reuptj d'r opgeluchtj: "Zoeë det veur ós pap is alvast klaor!"



Custers Taaladviezen

Veur Frans spraeke mèt lef:

Jan van
Meister Zef



De Kwakel



Jo! Sé.

Pleun woeëntj sinds kort same mèt Noud. Den zooy se zègge des se deindanger, mer ouch de sjoënfamilie good kins. Toch is det neet zoeë vanzelfsprekendj, zoeë bliktj. De bel ging en Pleun deej de deur ope. D'r sting eine mins ane deur en dae vroeg of José d'r ouch waas. Pleun keek dae mins get vraogendj aan en zagt det ze det efkes aan Noud ging vraoge. "Noud, d'r steit eine mins ane deur en dae vreugtj of José thoes is, hae zal waal bie 't verkieërdje hoës zeen?" "Nae Pleun", zeet Noud. "Det is ós pap". Ze woeëndje toen dudelik nog néét same, zulle we mer zègge...



Good gezeen

Anita is óngerweges nao 't werk en merktj det de auto mer moeilik rietj. Ze zètj 'm ane kantj en zuut 't al, bandj kapot! Mèt 't idee 'dao gaon ich neet allein aan zitte te knómmele' beltj ze Stefan en dae kumtj drek. Same hole ze alle spulle oet de auto op zeuk nao 't reservewiel en gereidsjap. Ze vinje nog de rozienkes van wie die jóng klein wore, mer de kruussleutel kómme ze neet tege. En dae sleutel dae in Stefan ziene auto zitj, dae pastj neet. Stefan is toen trök heives gereje want dao haje ze d'r nog eine, dae pees gelökkig waal. Dus toen höbbe ze gauw, zónger te vloke, dae bandj verwisseldj en kóst Anita gaon wërke. Wie ze later dae daag bie Stultjens de auto nieërsat en de klep ope deej óm de kapotte bandj te pakke, zaag ze 'm drek zitte. Heure kruussleutel!




Wisj dj'r al..

- det Marlies tege Yvette vertèldje det ze binnekort get te vere haje;
- det ze zagt: "Pap en ich zeen den al 32 jaor same!"
- det Yvette det bekans neet kóst geluive en zagt: "Des al langer as ich bestaon!"
- det Eefje veur Aodjaors-aovendj op zeuk waas nao 'ne DJ óm de muziek te verzörge;
- det ze Mike Breeuwer apptje: "Hey Mike, wae organisere 'n New Years Eve fieëstje bie Joeri. Kóntj gae mèt BreBo den dreie?";
- det Mike tröksteurdje: "Zooj kónne, höbs se eine datum?"

De Kwakel

CV DE MOEREBUUK
Jaorgank 58



BÓNTJE AOVENDJ

3 & 4 FEBRUARI

KAARTVERKOUP 29 JANUARI

14:00 uur

Interview Zunjig Aovendj

Aafgeloupe jaore höbbe wae as Zunjig Aovendj Comité de ieër gatj óm 't programma veur vastelaoves-zunjig te bedinke. Door de corona waas 't neet meugelik óm dit inne kroeg te organisere. Wae haje nateurlik al ieërder ein vastelaoveskwis gemaaktj, dus det móst in 'n online jeske waere gegote. Gelökkig wore eine houp minse enthousiast óm ós te helpe, woeëdoor 't lökdje óm dit vorm te gaeve. De veurpret waas veur ós minstes zoeë groeët as veurgaondje jaore. Dank veur alle leuke reacties en de sjoeën foto's die wae höbbe moge óntvange. 't Waas 'n apaarte ervaring. Mer wae zeen aevegood hieël blie det wae deze vastelaovendj weer 'n activiteit inne café kónne doen.



Nicole en Lieke

Typisch ein vanne slegter



Noortje en heure vrindj Joris höbbe ein leuk boorderieke gekocht in Ospel. En op ein boorderie dao huuertj vieë rónj te sjarrele. Op 'n gegaeve moment verteltj ze enthousiast det d'r binnekort ein verke kumtj, "en hae hètj Troy! Mer ieërst gaon wae zaoterdig 'n groeëte diepvrieskist ophole." Dit leverdje veul vraogendje blikke op: "Dich geis det verke drek slachte?" "Jeh nae!", sjrók Noortje noe zelf ouch, "det is zón aojerwètse diepvrieskist. Dao make wae ein nachthok van veur Troy. Det is good geïsoleerdj tege wörmdje én tege de kaaj."

Post veur ós Rick

Tim Benders vreugtj aan Myrthe: "Woeëróm kriege wae post veur os Rick mèt R. Benders? det is echt gek, dae heet hie noeëts gewoeëndj." Myrthe lieëtj Tim effe zelf dinke, mer verlostj hum mèt 't antwoord: "Wae höbbe mesjien eine zoon dae Raf hètj? ..."

Wisj dj'r al..

- det Joost zien sjoeënvader buxus haaj gewónne bie 'ne kwis;
- det Nicole zich aafvroog, wat veur eine kwis det den waas;
- det ze 't mer raar vónj det ze dao 'n geweer as pries haje.
- det we inne zomer 'n paar daag neet mochte barbecue-we van de brandweer;
- det Frank Stals 't dao neet mèt ins waas en zagt: "Ich bepaol zelf waat ich doen in mien eige hoes en tuin!"
- det Rick Geelen dao-op antwoordje: "Nae nae Frank, det bepaoltj Judy nog altied!"



Levent

Zelf tickets verkopen?
Zo simpel is het!

www.l-event.nl

De Kwakel



Tandenfeest

Dex (6 jaar) haaj eine tandj oet. Hae vónj 't te gek, want noe kos d'r dae ónger zien kósse lègge veur de Tandenfee. Toch kos hae d'r neet geröstj haer kieke, want weem is dae Tandenfee eigelik? Hae vroeg 't aan mama Ivette en die bedacht nao ein tiedje om 'm toch mer de waarheid te vertèlle. "Dex, mama is de Tandenfee." Dex keek raar op en zagt: 'Huh verkleed jij je dan echt als Tandenfee?' Wae zeen benoedj of Ivette mesjien al ein vast-elaoves pekske klaor heet ligge?

VEULENTJE KNIPPE

Iris (5) veugtj zich tiejes de vakantie dèk de haor oet 't gezicht. Roan (7) vèltj dit ouch op en hae heet de oplossing veur zien zusje. "As wae trök zeen van vakantie kan Iris zich 't bèste ein veulentje laote knippe!" Angelle en Martijn kieke ins bedinkelik en begriep effe later det Roan 'eine pony knippe' bedoeltj.



FYSIOTHERAPIE
PHILIPSEN & MEIJER



Wichterkal

Jenthe (4 jaar) haaj ein nichtje gekrege en noe woeëj ze d'r zelf ouch nog ein noew zusje bie. "En den wil ich Keet, want Niene hób ich al gehadj!"

De fanfaar geit dit jaar nao Friesland op uitje. Lien (6) huuertj dit en bedinktj zich drek: Vries-landj, is het dao kaod den?

Loeka (6 jaar) Wae zeen weer op vakansie gewaestj nao Frankriek. Mer neet nao dezelfde Frankriek huer. Wae gaon altied nao eine angere!

De euverbliefmoder droog eine sjoeëne kersttrui mèt 'ne iesbaer d'rop. Zeet ein van die wichter: "Det kloptj neet det dae iesbaer ein möts op heet en eine sjaal óm, want iesbaere laeve altied inne kaoj.

Teun (7 jaar) ging mèt Tim boeëdsjappe doon. Wie ze bie de mik-aafdeiling kwome zaag d'r 'n toet puntjes ligge, woeë '8+2 gratis' op sting. "Des henjig," zagt Teun, "det zeen dus 10 bruuedjes gratis!"



Meike (8 jaar) 't Weurtj steeds werner en 't ies smèltj. En det is ouch neet good veur de iesbaere. Daoróm mótte wae zunig zeen oppe aarde.

Fay: wae zeen van 't JWE en wae kómme ugge vriewillige kerstboom ophole.



Wisj dj'r al..

- det Oma Annie eine mail woeëj versteure, mer det lök dje neet good;
- det ze daoróm de hulp van kleindochter Emmy in sjakeldje;
- det ze zagt: "Ich wil det versteure nao ein Gmail-adres, mer woeë zijt dae "DJ" op 't toetsebord toch?"



De Kwakel

BACHELOR CLUB
ELL
bie Joeri

SEBASTIAANSTRAAT 7 • 6011 RD • BACHELORCLUB@KPNMAIL.NL



KOOLEN
DE ECHE BAKKER

De tesse vol

Ivette haaj 'n fieëstje mèt de dames van 't voetbalteam bie Joeri. Dit waas eine gezellige aovendj en samen mèt Anouk bleef Ivette nog efkes hange aan de bar. Toen het toch al get laat waas, woeëj Ivette nao heives. Ze ging de jas pakke, mer "Deh dae hingtj d'r neet mieër". D'r leek waal eine jas op dae van heur, mer "Dae is 't zéker neet!!" Dao waas Ivette heilig van euvertuugdij! Nao lang aandringe van de angere aanwezige, heet ze de jas toch aangedaon en verhip: "Deh! Deze jas heet ouch Ricola en luppebalsem inne tesse. "Zoeëj 't den toch miene jas zeen?"

Kaak vanne dorst

't Is de kampveuraovendj van 't KVV en ouch Guusje (4 jaor) is op 't veldje. Ze geit nao de bar en vreugtj òm eine ranja. "Det is good," zeet Nicole die achter de bar steit te helpe, "dae pak ich dich zoeë." Òngertösse taptj ze de bestelling aaf woeë ze mèt bezig waas. Guusje kiekjt dit effe aan en merktj op: "Hey! Mer zoeëveul ranja hoof ich neet!"

Wisj dj'r al..

- det Yvon van Logtestijn van sjoemparty's hèltj?
- det zie det zoeë leuk vintj, det ze die ouch gaer thoes organiseertj, 't leefst inne keuke?
- det ze de volgendje kieër zeker baeter zal oplètte as ze de wastablette veur 't wasmesjen in 't aafwasmesjen duit.



11 versjille



Deure kal

Aafgeloupe jaor waerdje de appartemente van 'de aoje zaal' opgeleverdj. 10 appartemente die ein noew thoes ginge waere veur jóngere van Èll. Pleuni haaj smiddigs 't contract geteikendj en kreeg innegang heur sleutels. Saoves ginge Koos en Nell 't noewe stulpje bekieke, terwiel Pleuni aan 't wèrke waas oppe kouwpaovendj.

Al snel huerdj ze det bie de bure ouch laeve waas, dus ging Nell effe gojedaag zègge. Zoeë kwaam 't dus det ze in de trappehal gezellig stóngte te buurte. Wie Koos effe later ouch nao boete kwaam, keke Nell en Koos zich deindanger aan en ze dachte drek 't zelfdje: shit alle sleutels ligge nog binne! D'r zaat niks anges op den saoves de slotemaker te belle. Nao 'n oor of twee wachte kwaam dae vakman en binne ein paar minute waas de deur ope. Toen haje ze gelökkig snel weer alle sleutels inne henj, mer ouch ein dikke raekening!



Wisj dj'r al..

- det Stijn mèt de vastelaovendj verkleidj waas as Super-Mario;
- det zien vermómning bliekbaar erg good waas;
- det Koos al ein kwarteer naeve 'm sting wie d'r zagt: "det ós Stijn nog neet hie is, dao snap ich niks van!"



Breujendje hoonder mós se neet stuuere

Op initiatief van de Dörpsraad geit 'nne wèrkgroep "Molenveld" aane slaag, óm ideeje te bedinke waat mèt of op de vriekómmendje gróndj vanne voetbalclub kan gebeure. Ellske is benoetj waat d'r allemaol bedacht geit waere en geit alvast op óngerzeuk oet. As ieëste kiekjt Ellske weem d'r neet in de werkgroep zitj.

Dao zitj nemes in vanne Ruiterclub. Det kan vanalles beteikene. Kan zeen det die vanne Ruiterclub neet dèk oppe site vanne Dörpsraad kieke. Kan zeen det se 't drök hóbbe mèt anger zake en daoróm geine tied hóbbe óm te vergadere en te brainstorme. Vreuger haaj de Ruiterclub heur oefenterrein op Meuleveldj. Det waas nog veur Schansbeemde d'r kwaam. De Ruiterclub zitj good woeë ze noe zitte. Dao zeen nog gein planne veur wuuningbouw, dao weurtj gesproeidj as 't stuutfj en vanne Sjötterie hóbbe ze gein last. De paerd die sjrikke waal ins as d'r 'n fieëstje is en dao weurtj gesjote. Det sjete gebeurtj echt mer zeldje. Nae, logisch det de Ruiterclub nemes nao dae werkgroep steurtj.

Weem ouch neet inne wèrkgroep zitj is de hengelsportvereniging Sint Petrus oet Wieërt. Dao waas kal det die 'nne twieëdje vèsviever zoeëje willen hóbbe speciaal veur de jeugd. Min of mieër 'nne oefenvèsviever. De jeugd mót mieër aan sport gaon doen en 't sjientj det d'r behoefte is aan mieër sportvèssers. Dao liktj ouch subsidie veur oppe plank bie de Provincie. "Gaef de jeugd neet allein vès mer ouch 'nne hengel" zagt de Partie vanne Diere in heur verkiezingsprogramma. Mer noe d'r nemes van de vèsvereniging inne wèrkgroep zitj, is 't vermoede det d'r geine animo is veur de twieëdje vèsviever.

Ouch vanne Sjötterie zitj d'r nemes in dae wèrkgroep. Die dinke waarsjienlik: "Wae hóbbe zoeëlang op 't veldje van Kunnekoel illegaal ós kieëte gatj staon, laote wae ós noe neet gaon bemeuje mèt 't sjeetterrein veur 't volgendje dekenaal." En trouwes, ze hóbbe heur henj vol aan lejewerfacties, op bølkes sjete mèt de groeëte buks of mèt 'n windjbuks, doe wilt neet wete waat det aan noew leje trèktj. Dao hóbbe ze werk zat mèt. Nae, de Sjötterie geit zich neet bemeuje mèt de óntwikkelinge rónjdj 't "Molenveld".

Ellske realiseertj zich det d'r nog veul mieër zeen die neet inne wèrkgroep zitte. Den is d'r nog veul mieër waat d'r zeker neet geit kómme. Mer det is allemaol speculere en dao duit Ellske neet aan mèt.

Laot die minse die waal inne wèrkgroep zitte noe mer ieëst ane gang gaon en ideeje oetwèrke.

Vreuger lieërdje Ellske al op sjoeël: "Een broedende kip moet je niet storen."

Det geldtj ouch veur 't aod voetbalveldj "Molenveld".

Containers veur aafval, PMD en glaas

Wae koste veurig jaor 'n paar kieër keze tösse groeëte en kleiner containers. Veur greun koste d'r zelfs twieë waere bestèldj. Greun containers edere twieë waeke lege, gries zeen deurder en eine kieër inne 4 waeke lege. Bie de bringplaats achter 't kirkhof kóns se glaas bringe en ouch plastic, blik en leeg drinkpek. Völ gemèkkelikker koste ze 't veur Ellske neet make. Ich hób d'r aard aan óm alles good te sjeije en as ich zeen det de bringplaats d'r netjes bie liktj, kóm ich gaer snel weer trök. Ich kan mich den ouch greun en gries ergere as d'r minse zeen, ich vermoed oet Wieërt, die meine det ze d'r hie in Èll 'n zootje van kónne make. Groeëte speegels, 'n klappaemke, 'nne kinjerwage en 'n mekanodoeës oet de jaore zeventig mèt nog sjuufkes en iezer staefkes en heukskes. En waat tunktj uch van dae idioot, ich vermoed ouch weer emes oet Wieërt, dae 4 liter witte grondjvèrf heet ómgèsjötj inne PMD bak? Terwiel se juust in Wieërt alles gratis kónst wègbringe. Kónst 't dao ter plekke sjeije en de grondjvèrf apaart zette vanne plafondvèrf of aafwirklak. Minse dootj eur bèst óm 't tegooj te doen. Dao zeen ós (klein-)kinjer later blie mèt. En det die van Wieërt heure rómme mer in Wieërt laote.



De Kwakel

CV DE MOEREBUUK
Jaorgank 58

Dörpsraad in gesprek mèt Èller jeugd

De Dörpsraad duit zien bèst óm jóngere te betrekke bie de Dörpsraad, mer wiltj ouch gaer huuere waat die jóngere zelf belangriek vinje.

Waat zoeëje de jónges en maedjes wille det de Dörpsraad ging doon veur heur? De bie-einkomst waardje georganiseerdj bie de Bachelorclub, dao kumtj op vriedigaovendj dèkker veul jeugd, as d'r inne kieëte niks te doon is.

Bie binnekoms worde de leje vanne Dörpsraad verrastj. Jónk volk zat, det waas dus 'n gooj keus gewaestj. As ze effe later de jóngere vraoge óm mèt te gaon nao het zaelke, den bliktj det de meiste blieve plekke aan 't buffet. Mer 'n klein groepje ging mèt 't zaelke in. Die angere bleve zitte. Woeërom? Verlaege, bang veur commentaar van anger, neet de nek dörve oet te staeke?? Ellske wètj 't neet en heet de reje neet gehuurd. Mèt det klein groepje waardje d'r good gekaldj en dao is ouch waal get oetgekómme.

Ellske heet waal 'nne raad veur de Dörpsraad. "Laotj uch oetnuuedige veur 'n half oor in 'n kieët. Beveurbieëldj oppe Hoeëgstraot of oppe Bösstraot". En veur de jeugd 't advies: "As gae 'n idee höbtj, as dj'r örges get van vindtj, zèktj 't tege eine vanne Dörpsraad. Waarsjienlik det die uch daomèt wiejer helpe". En verder: "Blietj veural lol en plezeer make. Det vindtj Ellske ouch belangriek". En as de jeugd vindtj det 't noe allemaol good is, den laot ane Dörpsraad wete waat d'r mótt gebeure óm 't blievendj good te laote gaon. Spraekendje minse zeen te helpe.



Ellske

Kritisch, sjeep en oplèttendj.
Det is Ellske. Dees aof tante
duit op heur eige meneer

verslaag van
waat ze
zoeë-al hie
inne buurt
heet gezeen
of gehuurdj.



Koelómp dae Koeberg

Ze haje weer 'n geweldjige
kamp-locatie wete te vinje veur de
aafsloeting van 't JWE-seizoen. En
noe ginge ze mèt ein paar leiders

kieke waat dao allemaol te doon waas. Noortje waas d'r vanoet 't werk al dèkker gewaesj, dus die ging neet mèt. Ze haaj waal mèt Jo de aafspraak gemaakt, det 'n deil JWE-ers zoeëje kómme. De locatie waas 'n pareltje; op 't terrein 'n bos, 'n groeët speulveldj, 'n luxe ingerichdje keuke, eine veranda mèt podium en 'n stookplaats 'óm U tege te zègge'. Super enthousiast ginge ze trök nao Èll. Mer toch wore d'r get vraogteikens. Waat vreemdj det Jo d'r zelf neet waas. En bietje raar det de mins dae de rónjdleiding deej de hieële tied 'Jan' zagt en neet 'Jo'. Ouch vreemdj det wae nao Baarlo zóje gaon, mer det dees blokhut op loupafstandj van de Paladio waas. Juust, vlakbie 't centrum van Heldje. Dus de email waardje d'rbie gepaktj en dae waas toch écht óngerteikendj door 'Jo van Jong Nederland Baarlo'. "Dae man van net haaj 'Jong Nederland Helden' op zien shirtje staon!"

Ein telefoontje later waas 't helder: ze haje de foute locatie gebooktj! Neet Blokhut 'Oos Hoes' Aan de Koeberg 11 van JN Heldje, mer blokhut 'De Koeberg' aan Koeberg 1 van JN Baarlo!

BEZÖRGDJ?

Hans Muysers bringt de post rónjdj en die taak veurtj d'r den ouch mèt volle euvergave oet. Zoeë ouch bie Geert en Chrissy oppe Hoeëgstraot. Ze ginge eine daag d'r op oet en wie ze de oprit afdreijdje zoge ze Hans aankómme mèt ein net-iets-te-groeët brevebuspakketje. Geert gebaardje nog nao Hans, det d'r 't mer aan de veurdeur most lègge en ze reje aan. Bie thoeskomst troffe ze 't pakketje neet aan bie de veurdeur, mer in de gank. Naeve det pakketje laag ouch de brevebus. Waat bleek later, Hans haaj net iets te hel zien bèst gedaon óm 't pakketje door de brevebus te kriege.



Wisj dj'r al..

- det Sjoerd veur 't oetrope van prins Micky achter de bühne waardje gerope;
- det Nicole sjrik kreeg, det Sjoerd heur neet vertèldj haaj det hae de noewe prins waas;
- det Nicole toen hieël zenuwechtig waardje en oppe door eine hertslaag van ruum 130 haaj.



Slagerij Ruud & Marleen Heijkers

Hèt adres voor
koude & warme buffetten en barbecue's compleet

Sebastiaanstraat 19 Eil tel. 0495-551242
www.slagerijheijkers.nl





Ich bèn jeugdprins Ties,
zoon van Maurice Heijkers en Maddy Wilbers.

Op 10 mei 2011 bin ich gebóre,
En ondanks 't Walvaegersblood van mam 'nne
echte Moerebuuk gewóre.

Loester gaer nao meziek en kiek nao filmkes
op YouTube,
Speul spelkes op miene Switch en gaon gaer
nao de freerun groep.

Dit jaor gaon ich neet mèt de spekkebraojers
aete,
Mer ich hoop det ze mich in de optocht neet
zulle vergaete.

Same mèt sjötterre "Kei Kepot" al versjillende
kieëre mèt gedaon
En zelfs eine kieër as prins Ties móge gaon!

Mer noe moog ich echt dae prinsewage op
Det vinj ich super sjiek, echt top!

Jesse is miene adjudant, 'ne echte maat,
Dan weurdj 't zeker gezellig en laat.

Ich, jeugdprinses Imke,
bèn de jóngste dochter van Bas Moonen en
Miranda Saes

Ich bin op 24 augustus 2011 in Wieert gebóre,
Altied waal get drök en 'n echte kweknaas
gewóre.

Fleur is mien groeëte zus en Sjoerd is miene
groeëte broor,
Die maak ich zoeë aaf en toe 't laeve zoor.

Mèt mien hundje Lizzie knuffel ik gaer,
En veur volleybal gaon ich nao de gymzaal
haer.

Fiets dèk de brök op en nieër van 't
Kujeldreiers-riek nao 't Moerelandj,
En met de Vastelaovendj staon ich neet gaer
langs de kantj.

Super blie det ich dit jaor ouch op de
prinsewage maag staon,
En als jeugdprinses veuróp maag gaon!

Mèt mien adjudante Marit van Lemmenhof
Waerdj deze Vastelaovendj keitof!

Al 'n paar jaor geine echte Vastelaovendj mieër moge belaeve,
Dus zulle wae ós dit jaor hieëlemaol gaeve!
Wae zeen allebej drök en springe gaer,
En zulle den ouch regere inne orde vanne Springvaer!

Onger ós motto:

Aan 't net of euver 'n moor, same springe wae de Vastelaovendj door !

Wisj dj'r al..

- det bie Dick en Miny al sinds jaor en daag knien op 't kerstmenu steit;
- det dae ieëst eine nacht inne eek waerdj gezatte, zoeëdet d'r fijn zoor waerdj;
- det dit jaor de knien neet gesjiktj is veur consumptie;
- det hae eine nacht inne sjoëenmaakazien sting en neet in gewuene eek.



Weurdje vanne redactie

Waat sjiek det we dit jaor weer eine good gevöldje Kwakel höbbe moge make. Mèt oppe veurkantj weer eine prins, eine noewe! En ouch weer 'n jeugdprinsepaar! Waat sjiek det die weer veurop kónne gaon inne polonaise dit jaor. En wae d'r achteraan! Wae verheuge ós d'r op om uch weer te treffe inne cafés. Det dao de verhäölkes naobesproke gaon waere. En det d'r noew verhäölkes zulle óntstaon, die den weer in volle glorie mèt ós gedeildj waere, zoeëdet wae drek weer ein begin höbbe veur de Kwakel van volgendj jaor.

Bie 't sjrieve van de stökskes höbbe wae zelf 'n paar kieër gelache en wae dinke det d'r veur ederein leuke verhäölkes in staon. D'r is nauweliks get geloge in deze Kwakel, soms is 't waal erg sjoeën verteldj... Völ laesplezeer.

Anouk, Bo, Bram, Jos, Lieke, Nicol, Paul en Pleun.

*Spraakmakende begeleiding bij
Logopediepraktijk Eva Strous*

Garage Heemels



(P) **Print- &
Ontwerpstudio
Leudal**

De Kwakel is ein oetgave van 't kwakelcomité